

籌辦夷務始末

籌辦夷務始末卷之二十六

道光二十一年辛丑三月癸卯

諭軍機大臣等現當勦辦英夷恐智窮勢蹙分赴各海口滋擾盛
京最關緊要首宜扼要防堵昨據耆英等奏添造撞槍一百數
十桿又添設烏鎗九百數十桿均經降旨允准製造以資守衛
儻該夷舍舟登陸便可轟擊制勝諒該將軍已迅速趕辦並將
火藥加工舂鍊如式配合惟撞鎗烏鎗均係陸路施用未能及
遠設使夷船駛至非連擊大礮安能破敵摧堅盛京大礮無多
據奏少則不敷分撥大則工費浩繁自係實情然根本重地所
關匪淺既不可畏難苟安亦難因噎廢食況夷船所放大礮不

必登岸已能及我。若無禦敵之具，何以固要隘而衛軍民？該將軍駐紮海口，已閱數月，該處情形諒均熟悉。萬一夷船駛回，滋擾我兵，如何抵禦？及有無把握之處，著據實具奏。

戶科掌印給事中朱成烈奏竊查逆夷不知陸戰，我陸兵與彼相接，是謂以眾制寡，以能制其所不能。即彼水戰所恃者，亦不過船大而堅，帆捷而巧，礮大而準耳。一切戰法俱不能精，其船帆能用逆風，旁風獨順風不甚利。無風益不能行，且彼船高置礮亦高能上擊，平擊而不能下擊。雖有漢奸為之羽翼，亦可智取也。我軍果能奪其所長，擊其所短，斯可聚而殲之矣。謹做戰策約舉數條為我

皇上敬陳之

一廣東省河兩岸厚築土隄寬挑土濠以備逆夷再至瑋其全軍也隄以避礮彼如開礮則為土所埋濠以伏兵彼如過隄則伏兵齊起立即斬擒再於隄中作函洞以為礮眼於洞旁一丈之遠穿隄置長竹箒作為眼目以瞰夷船初來放過待其大來兩岸一齊開礮使彼左右不能兼顧河之上流多集已舊小船載引火之物令水勇在水中奮力推下以燒其前面彼抵前則不及抵左右抵左右則不及抵前我軍有一面得手該逆已成灰燼矣或謂函洞未免費工即於隄上牢置礮架點礮之人執牛革糠囊以避

彼之礮子此以柔制剛之法亦可得勝。臣愚竊謂宜兩用之。二月二十四日省河之戰。總兵長春英勇過人。若有護身之具。必不致礮傷其額。再聞省河不甚寬廣。夷船在河中流。不惟兩岸開礮可及。即強弩火箭亦可射到。該夷膽敢至此。可見並不知兵。自尋覆敗。不難剋期收復虎門也。一將逆夷逐出虎門。如敢仍踞內洋。彼之大船。我以小船擊之。彼之小船。我以大船擊之。可期必勝也。蓋彼大船開礮不便俯擊。我之小船高不過一二尺。彼礮已在六七尺以上。飛過我船。逼近可以任所攻擊。或謂小船距彼將近。彼有聯環鎗。可以俯擊。然此槍擊出至遠。不過百餘步。我

之小船在二三百步之外用可擊五六里之礮擊之斷無不勝之理此以散制整之法也又謂大礮用於小船須防其坐按成法有以米囊抵於礮後竟不坐者是可用也彼之小船亦載可擊五六里之大礮我之大船原不甚高礮可俯擊若用可擊十餘里之礮於七八里之外擊之彼斷不能至前且多傷斃此以遠制近之法也或疑大小船相錯不能分別擊之然以蜂擁小船既多以前一半分擊其小以後一半直趨其大小既圓其小矣待我大船將近一聞號令即已閃出前而我大船直前壓之矣迨至逐出內洋之後我軍攻勦之法百出不窮逆夷安得不投首哉

一逆夷退出外洋如敢再入內洋可設法制其大船也查逆夷船大如山喫水一丈有餘大洋水深可以縱橫如意若至內洋則水不盡深淺處或至膠舟並可於水底特設重險待其來以小舟開礮誘之誘至淺處險處彼船不得動安得不任我攻圍且聞夷船不能左右同時開礮左右同開則船覆我兵分左右以火礮齊攻必有一面得加凡與水戰皆宜確用此法且彼乘潮方入內洋我兵先分起與之游戰或竟堅避不出迨潮退然後奮勇叢擊必能大捷宋將岳飛在洞庭破楊太輪船以小船誘至淺水因而制之今若變通其法則彼之船不足恃矣

一無風之日可以出洋攻擊也。彼之船大，必須使帆，無風必下碇。我兵伺其下碇，以多槳小船四圍繞攻，專擊其船之近水處。數擊則破，破則沈矣。若彼小船在前攔戰，我軍即用前法，以前後分擊其小大。蓋彼小船無多，我以二隻戰彼一隻，即已立奪其魄。粵省連年用兵，豈無數百隻小船，且漁船亦可雇用。又彼大船為我小船所牽，我之大船正可直趨彼之小船，我之小船並可替出擊彼大船也。又有用木筏取勝者。查木筏整木平底，既不可翻，又不可沈。較諸船尤低，可以避敵。其制前後兩筏，以鉤環聯而為一。多設水輪木槳，使之進退迅速。前筏多用狼牙大釘釘於

筏頭上載火具。釘入賊船。縱火燒賊。我兵俱登後筏。摘環前進。用礮擊賊。可獲全勝。金敗宋將韓世忠。以無風破之。今用其法。則彼之帆不足恃矣。

一順風我之所利。可出奇制勝也。一法用敝舊大船。內載柴草。揚帆在前。以為障蔽。以牛革絮被兩三層。撐出船頭數尺。以防其礮。上用數水勇。及善沒舵工。專管使船。各執牛革。以避礮。後用多槳小船。載精兵火器。隨之。彼擊大船。則小船急進。大船一遇彼礮。即燃。燃則乘風。已抵彼船矣。彼恐延燒。不及顧我之小船。小船乘機。勦之。為彼礮之所不及擊。則彼之礮亦不足恃矣。再用廣東人所造鴛鴦礮。

子以燒其帆該逆尚有才遺哉聞此項礮子曾破水盜張保著有成效沿海各省正宜如式置造以為燒賊之具

一彼乘夜或來偷營多用無底空船以小船夾左右繼其後可以決勝也月黑之夜以此項船隻用牛革絮被裹於船頭多置旗幟草人靜待之彼如直前登我空船則沒於水彼用礮擊則可遮蔽後之小船後之小船待其開礮齊前擊之彼必失措或竟以此船乘夜勦賊亦可使之惶惑無主宋將張青曾用此法以誤敵敵人溺死者萬餘今誠偶一用之彼之船與礮均不足恃矣

一募水勇以間漢奸必能成功也蓋水勇皆漁戶水盜等

類惟利是逐。强悍輕生。又能袒席海濤。出沒自若。我誠榜示水勇。有能沈一夷船者。賞銀若干。斬一白夷黑夷者。賞銀若干。生擒一漢奸者。賞銀若干。則必奮勇圖之矣。即以所擒漢奸。放歸用間。以間眾奸。令各斬夷來獻。不但必赦其罪。且與水勇一律重賞。必多轉而內向者。一漢奸殺賊投首。眾漢奸皆為夷所疑。則逆夷之羽翼翦矣。蓋至我兵屢創逆夷之後。漢奸亦應知逆夷終滅。不復為彼用矣。一廣南破夷之法。亦有可用也。聞夷船失風。誤入廣南。廣南人遣善沒者入於水。以鐵鍊釘其船底。即以舟掣之。使擱於淺水。焚其船。而取其輜重。該夷至今在大洋行走。以

見廣南山為戒。見則斬舵工有常刑。其伎倆可知矣。昔鄭成功曾言該夷惟習槍礮攻戰之理。皆謬。蓋信然也。又宋將韓世忠與金水戰。以鉤繫鍊。飛擲金船。鉤住曳之。每曳必沈。今以此法制彼三板沙板等船。尤易為加。彼之大船。益無護衛矣。

以上數條。多主火攻。逆夷並無他長。且畏火攻。我誠扼其所短。多方以誤之。必成擒矣。至於開礮遲速。所爭祇在轉瞬之間。全在點礮兵將眼明手快。膽量過人。方能制勝。則恃統兵之將。委用得人矣。

諭軍機大臣等。本日給事中朱成烈奏陳勦辦逆夷戰策一摺。據

稱逆夷並無他長。不過船堅礮大。扼其所短。即可奪其所恃等語。著奕山等於到粵後。將摺內各條體察情形。是否可行。據實具奏。原摺著鈔給閱看。

山東巡撫托渾布奏。臣現在購匠設局。擬添鑄六七千斤大礮。度計沿海緊要口岸。總須有此大礮十六位。再附以二三千斤中礮二三十位。方足以資捍衛。臣先期分飭委員。趕赴各處購買生鐵二十萬斤。陸續運赴登州。一俟閩省匠人到東。即多雇本省鐵匠。令閩匠指示造法。迅速鑄造。務令多加鎔鍊。以期堅固。所需工費。臣與藩臬運三司暨各道府。公同捐廉置辦。

殊批總要推堅致遠更須有準方好妥實為之

甲辰

諭軍機大臣等前因山海關海洋有夷船遊奕降旨派哈琅阿前往協同堵禦現在該處安礮移營各事宜業已辦竣哈琅阿著暫行回京聽候諭旨所有隨帶前往之護軍參領寶玉等八員名即一併帶同回京其餘兵弁仍著原帶之員率同照常防範毋稍疏虞

丁未兩江總督伊里布奏竊查江蘇省洋面綿長海口紛歧崇明孤懸海外更為喫重自上年逆夷不靖熟籌堵禦之方該處設有重兵總兵田松林獨當一面尚能鞏固海

防此外則寶山縣之吳淞江口緊接大洋上海縣之黃浦江口毗連吳淞該二處防堵事宜均關緊要臣於回任兩江後即由上海馳赴寶山途中周歷巡查各弁兵分防地段隊伍整齊聲勢聯絡沿海師船漁船駐守口門隨時出入巡探不致稍有疏懈其吳淞江口東西礮臺及寶山之東門塘岸均經安設大礮多備火藥如有夷船進口足資抵禦提臣陳化成親駐帳房與士卒同甘苦氣勢尤為振作惟吳淞兩岸兵力尚嫌單薄雖經前護督臣程晉采將挑備太湖營兵三百名提標營兵二百名添駐東西礮臺而江東礮臺遠接高家齋洋面人煙寥寂必須岸上多宿

防兵方可遙為犄角。又寶山城外小沙背石洞張家橋等處地勢空闊濱臨外洋。上年曾調漕標官兵分駐防堵業經撤回。其上海縣東溝地方為上寶川沙三廳縣交界臨江扼要之區。江岸村莊鱗次而居。此時均應派防以杜逆夷登岸剽掠。業經臣飭調安慶營兵三百名。札委守備孫貴專駐吳淞東岸。俾壯聲威。另調遊兵營兵二百名。漕河兩標兵各一百名。徐州鎮標兵二百名。定國營兵一百名。遴派千把外委帶赴小沙背東溝等處駐防。並令寶山上海二縣派撥練勇七百名。協同防守。由吳淞營參將周世榮及駐防上海漕標右營遊擊王永祥稽覈勤惰。旋准廣

東來咨逆夷在粵猖獗恐兵船四出滋擾江省仍須早為
添備方資應手因又札飭備調提標兵六百名安徽撫標
兵四百名蕪番泗州兩營兵一百名在營差操聽候調用
分別陸續咨行去後茲於三月初二日承准軍機大臣字
寄道光二十一年二月二十六日奉

上諭本日據裕謙奏夷船遊奕往來並酌辦善後情形一摺江蘇
海口紛歧必當仍遵前旨嚴密防範毋稍疏虞儻遇夷船攬近
著分飭將弁度其地勢遠近足以相及方可開放槍礮伊里布
仍酌量情形或須添兵堵勒之處著一面奏聞一面調撥不可
坐失事機儻防堵稍有不加或被該逆竄入港汊滋事惟伊里

布等是問恐不能當此重咎也懷之等因欽此仰見

聖明洞燭幾先預防江省兵單飭令添兵堵剿欽服難名惟是夷船如果北駛江浙兩省祇可互相照會不能彼此應援占寶鎮海相距八九百里陸則程途較遠水則海道難行夷船近岸瞬息可至若待浙兵應援實有緩不濟急之勢臣前既已備調官兵一千二百名足資接濟所有浙江派委總兵帶領兵舟馳赴江蘇接應之處似可

諭飭停止蓋浙江不能應援江省猶江省之難以策應浙江上年欽差大臣裕謙在兩江總督任內覆奏御史石景芬條議一摺亦曾有江蘇祇堪自守不數會勦之語諒已早邀

聖鑒臣受

恩深重。非敢稍分吟域。實虞坐誤。事機轉滋。咎戾至金山之礮臺。近臨洋面。常熟之福山。對渡通州。鎮洋之劉河。直接吳淞。俱為沿海要地。亦經屢飭各縣營同派防官兵。竭力守禦。並遵欽奉

諭旨。勸諭各村鎮團練義勇人。自為守。其餘沿海各處。分兵備防。聲息相通。部署均尚周妥。臣現回上海。居中策應。並彈壓閩廣商船。毋稍生事。閩閩俱屬安堵。仍不時親赴寶山一帶。策勵將士。教練膽勇。俾知熟悉防務。目今江省海面尚無夷船竄伺。惟春水方生。南風漸起。萬一該逆夷乘風北

竄。僕敢擺近海岸。即當會督提鎮諸臣相機籌辦。開礮轟擊。仍當慎導。

訓示度其地勢遠近。礮力足以相及。方許開礮。或能誘之登岸。陷令入淺。並當設伏檢俘。痛加勦洗。再江蘇擬鑄八千斤。及六千斤大鐵礮數十位。因委赴湖北採買紫板鐵斤。一時未有此種。江省海防緊要。難以稽延。已飭蘇州省局撥解洋銅十二萬斤存貯上海。俟浙省礮匠梅在田到。即行開鑄。銅礮務飭身口合度。致遠有準。並應鑄鐵礮。仍交在浙閩匠承領包辦。俾資迅速。所需工費。即於軍需捐款項下動支。

伊里布又奏。臣於三月初六日。承准軍機大臣字寄。道光二十一年二月二十七日奉

上諭。本日據琦善等奏。虎門礮臺失守。提督關天培陣亡。烏涌卡座被擊。逆夷兵船乘潮迅駛。距省不過三十里。現飭將弁竭力抵禦等語。浙省洋面現在尚有夷船遊奕。江浙各處海口均關緊要。著該大臣等務遵前旨。加意防守。毋稍疏虞。又據海齡奏。請將沿海通商各馬頭港口。嚴密查察。暫為一律封閉等語。著該大臣等體察目前情形。是否可行。悉心妥議具奏。欽此。查江省雖無夷船遊蹤。而海口均關緊要。誠如

聖訓。必須加意防守。臣已遵

旨添調鎮營各兵備防堵勦並嚴飭守口員弁慎固網緲毋稍疏懈其江西一省界連廣東贛州則逼近惠州南安則壤接南雄雖距粵中省城尚遠斷不致虞闖入而該處民風獷悍會匪鹽梟煙販時時出沒萬一聞風思逞關係非輕臣已咨行江西撫臣鎮臣督飭地方文武添委員弁密加防範至海齡奏請沿海通商各碼頭暫為一律封閉等語覈其摺內所指各情係為杜絕接濟嚴防漢奸起見粵省不日進兵攻勦難保無夷艇四出自應封閉港口不准一船一人出入俾內地米糧硝磺等物不致透漏出洋庶該夷勢漸窮蹙辦理較易為加臣已札行司道將江蘇省沿海各港

一律封閉嚴密巡防毋任漢奸溷迹仍飭候夷務事竣照舊開港以資商漁生計

諭軍機大臣等伊里布奏熟籌沿海情形分別添兵備防一摺江蘇省洋面綿長海口紛歧經該督周歷巡查扼要派防並添調兵弁駐守著照所議相機妥辦該督現回上海策應彈壓仍著隨時親赴寶山一帶會督提鎮妥為防範沿海各要地亦著嚴飭各縣營同派防官兵竭力巡防毋稍疏懈至該省海防緊要鑄礮不容稍遲既由蘇州省局撥解洋銅十二萬斤即應趕緊開鑄著即動款迅速妥辦毋誤事機又另摺奏沿海通商各港口酌擬一律封閉等語江蘇洋面現無夷船遽將港口封閉商

販未免向隅。惟是漢奸之透漏消息。接濟米糧硝磺等物。亦不可不嚴密防範。著嚴飭該管司道等。於商漁船隻出入之時。實力稽查。無稍疏懈。亦無滋騷擾。是為至要。所有該省沿海各港。此時著無庸封閉。

伊里布又奏。再臣前由浙省回江。於餘姚舟次。承准軍機大臣字寄。道光二十一年正月二十八日奉

上諭。本日據朱樹春鹽城營及海州陸路營各管有海口二處。東海營有海口六處。現於額巡兵丁之外。增添數目。實力巡防等語。該二營本係漕督所屬。自應督飭兵弁認真巡查。惟伊里布統轄兩江。凡各海口地方。均須預為布置。嚴密稽察。毋令逆夷

關入轉瞬南風司令難保該逆船不沿途滋擾著伊里布會同朱樹督率將弁兵丁分布要隘梭織哨探見有夷船蹤跡度其相距遠近足以相及即行開放槍礮併力攻擊若夷船毫無蹤影每日施放槍礮空糜火藥成何事體經此訓諭之後儻防堵不加將來有夷匪竄入惟伊里布等是問恐不能當此重咎也等因欽此臣查漕標所轄之鹽城東海二營均有海口非重沙壘護即水淺沙膠惟海州贛榆地方東北二面臨海有鷹遊山與孫家山北外洋可直抵海州城外二十餘里之臨洪口地方但該處湖漲之時水深二三丈不等逆夷船身笨重喫水較多不能駛近此處既由漕臣朱樹嚴飭

各該營於額巡兵丁外增添數目在海口實力巡防足資
備禦臣回任後復諄飭各該文武加意防範現在沿海布
置情形業經另摺奏陳並欽遵

諭旨遇有夷船蹤跡必須相度遠近礮力足以相及方許開放轟
擊斷不准空糜火藥自為驚擾亦不容稍涉大意致有疏
虞

硃批知道了

兩廣總督祁墳奏道光二十一年三月初八日臣在江西
秦和縣舟次承准軍機大臣字寄二月二十九日奉

上諭本日據楊芳馳奏抵粵日期現在防守可期無虞等語賊船

駛進內河離省止二十餘里。雖據揚芳奏稱防守無虞。情形究屬喫重。著該將軍等仍遵前旨。星夜進行。毋致貽誤。等因。欽此。仰見我

皇上宵旰憂勤。拯民水火之至意。詳閱揚芳原奏。備悉逆夷猖獗。省城喫重情形。臣中心如焚。即應減此朝食。以紓憤懣。前經臺奉

諭旨。兼程趲行。惟因安徽一帶沿途雨雪濡滯。當經據實專摺奏明。並將酌令江西藩司趙炳言。即在江西南安府安設糧臺。駐紮料理。解運餉銀。及先行函致署督臣怡良。迅速雇覓漁船水勇。並預備柴草火船。以待臨時調用等情。一併

陳奏在案。昨於三月初四日。馳抵江西省城對岸沙井地方。詢悉水程較為迅速。即於夜間登舟前進。一俟抵粵。即當會同將軍奕山等。速籌辦理。斷不敢稍有延誤。查兵食一項。最關緊要。臣記廣東省常平大有兩倉。現尚應存穀十餘萬石。而廣西省米商。向在梧州府地方聚集運販。順流而下。過廣東肇慶府及廣州府之三水縣。直抵廣州。採辦軍糧。亦極順易。臣出京時。已將情形逐一面奏。出京後。在直隸河間府途次。札飭廣東藩司。速行採辦。並令將大營需用之火藥火繩軍裝器械及鑄造礮位之銅鐵料物。匠役人等。一併早為購備。免致臨時貽誤。現據江西藩司

趙炳言稟稱接准廣東藩司梁寶常移咨已先由肇慶府採買米石存貯備用總可無誤供支其餘一應軍需亦經屢次札飭該藩司等協同次第籌辦至所需餉銀前已奏明由江西省提撥銀六十萬兩解赴廣東南韶道庫收貯聽候提用現據藩司趙炳言面稟接奉署督臣怡良檄稱粵省現有藩關運各庫存銀儘可先行借用俟部撥軍需銀兩解到再行歸款無虞周轉不敷臣又思此刻省城喫重藩司大員不能離省擬即飭令藩司梁寶常駐省在糧臺總局隨同臣就近經理韶州府適中之地應設糧臺即責成南韶道楊九吃督同韶州府及委員暫行照料仍須在

英德三水等縣及佛山鎮設立小局二三處以便委員逐站護解無誤供支現亦飭知梁寶常遵辦再據江西藩司趙炳言稟稱接到廣東藩司來文已飭令佛山同知雇匠趕鑄八千斤鐵礮四十位現在尚未鑄成又據將軍奕山咨會已飛飭調安徽江西兩省備存火藥各數萬斤並咨調湖南廣西存貯大礮以備攻勦惟火繩一項臣素知廣東省因麻斤缺少向用榕樹根搗爛取絲用硝磺煮造點燃不能得加臣現飭江西藩司本即在江西製備火繩隨時運送粵省以期適用

諭軍機大臣等本日據祁墳奏途次豫籌糧臺應辦事宜一摺前

據奕山等奏先飭江西藩司趙炳言赴南安採買兵糧順遞南
雄一帶當已諭令照議辦理茲據該督奏稱廣東省已先由肇
慶府採買米石存貯備用無誤供支等語所有奕山等前奏江
西採買兵糧應否停止抑或仍令採買俾得源源接濟計此時
該將軍等業已抵粵著祁墳體察情形妥籌辦理其提撥餉銀
一節粵省藩關運庫既有存銀可借無虞周轉不敷惟軍需最
關緊要毋任意存推諉致有貽誤所奏分設糧臺趕鑄礮位製
備火繩等情所辦均好即照所奏妥速籌備再前據怡良等奏
飭令藩司梁寶常攜帶庫銀十五萬兩隨帶委員駐紮佛山鎮
設局支應茲據祁墳奏令該藩司駐省經理糧臺總局自因未

與怡良等會面。以致兩歧。著該督熟審現在形勢。究應駐紮何處。妥籌定議具奏。

閩浙總督顏伯燾奏。竊查閩省夷務。自上年調派兵丁。防守海口。其陸路外標之兵。及陸路本標外營之兵。每名日給口糧銀四分。水師本標之兵。照巡洋緝匪章程。日給口糧銀三分。因係一時調派。初未料及。為日久長。詳悉籌議。即各兵亦以為時無幾。俱各相安。臣到廈後。密看大局。嘆逆現在廣東滋擾。一經大創。難保不四處紛擾。儻逆船竄至閩疆。即應痛加攻擊。且須籌備船隻。近海接仗。與上年僅止防堵者情形迥不相同。現在每銀一兩。易錢一千五

百六十文領銀四分得錢不足六十三文領銀三分得錢不足四十七文其米薪鹽菜衣履一切等費無不取給於此。

國家養兵千日用之一時苟有人心何敢以口糧之多寡沾沾較量然兵凶戰危一旦鋒鏑在前存亡俄頃以不足果腹之口糧欲人效命非所以固軍心而勵士氣查軍需則例開載兵丁月支鹽菜銀九錢加給四錢每十名合給餘丁跟役共三名餘丁跟役每名月支鹽菜銀五錢兵及餘丁跟役日支口糧米八合三勺細粟一人所得銀米再益以十人所得餘丁跟役銀米以米折銀均勻牽算每人每

日可得銀七分四釐零。今調防各兵名曰防守而以防兼
勦實與征兵無異。即水師以本標之兵防本轄之地其效
命致加亦與征兵何殊。上年六七兩月戰歿及被傷四十
七人皆出水師。是其奮勇出加尤有明驗。今調防海口水
陸各兵有一萬三千餘名。若照軍需定例給發鹽菜口糧
每月需銀二萬八千餘兩似覺少優。若將陸路防兵比軍
需酌減每名日給六分水師防兵日給五分在各兵均可
果腹有資而較之軍需則例每月尚可省銀五七千兩不
等。此外行裝鍋帳及各項安家工食紙筆藥材等物凡軍
需所得開銷者概不准支所省已多兵丁雖愚最易感動

有因一言激發赴湯蹈火皆所不辭況出

朝廷浩蕩之恩哉又武職廉俸無多文員未補缺者亦無廉俸
可食可否武職自副將參遊以下候補文職自通判州縣
以下准照軍需之例支食鹽菜口糧不給跟役官員人數
無多所費有限合無仰懇

皇上逾格鴻慈或照軍需之例或照臣所酌減

恩給特頒宣示中外自

旨下之日為始遵照奉行俾海濱荷戈之士人人有挾纊之恩自

必倍增踴躍其在事文武具有天良亦無不感激圖報矣
諭軍機大臣等據顏伯燾奏調防水陸各兵請照軍需酌減給發

及在事文武各員支食鹽菜口糧等語。固為激勸官弁兵勇起見。惟現在大兵雲集廣東。所撥各路兵丁已有一萬六千八百多名。先後僅撥銀三百萬兩。浙江軍營截留部撥銀亦僅九十餘萬兩。其餘防堵省分。若俱照軍需之例酌減給發。為數未免過寬。設各省援照奏請。既不能一概准行。又未便此准彼駁。著顏伯燾再將現在情形通盤計畫。應如何裁減節省之處。詳晰籌議具奏。

戊申。參贊大臣楊芳。廣州將軍阿精阿。廣東巡撫怡良奏。竊嘆逆猖獗情形。並味喇堅領事哆喇鄂代求通商緣由。歷經陳奏在案。三月初一日。承准軍機大臣字寄。道光二

十一年二月十七日奉

上諭本日據琦善奏稱逆夷聞大兵將集意圖滋擾一摺等因欽此。李等當即敬謹跪讀並將琦善原摺閱看密咨提臣一體欽遵辦理。查該逆自二月十六日聞進省河旋即退出旬日以來並無動靜。隨據咪喇啞等國向准貿易商船陸續駛進黃埔。由洋商按日具報。查該夷等貨船先被喫夷阻遏以致貨多損壞。現既陸續進埔。乘時貿易無不歡忻鼓舞共戴。

皇仁即喫逆各商亦無不在旁歆羨。李等察看該逆現在情形似因大兵雲集省城防守加嚴不敢驟然滋事。並因前此咪

喇堅代求通商。既經李等代為陳奏。不無希冀之心。所以旬日間一無動靜。惟逆夷說計多端。水陸藩籬。先已被其聞破。一時未能修復。難保不乘隙復來。防守之嚴。須比逆船在省河時。密益加密。省外東南一帶州縣。多係沿海處。處皆須防護。節經李等札飭各營縣。多雇壯勇。並於各要隘鑿船沈石。密釘暗樁。預為攔截。共資保護。陸路提臣郭繼昌向駐惠州。先於正月來省。前督臣琦善因惠州本屬海疆。囑令回惠防堵。其潮州南澳。又在惠州之東。李等責成各提鎮嚴防。務使聲勢聯絡。省城遷避。各民漸次撤回。其各路客商資本較鉅。尚在觀望。須俟買賣流通。方能安

堵復業

楊芳又奏再調征本省各外營及各外省綠營官兵應支鹽菜銀兩例載出征在邊口以內每兵月支鹽菜銀九錢每兵十名餘丁三名每名月支鹽菜銀五錢出邊之口每兵月加銀四錢如地方情形不同由該督撫隨時酌量奏明辦理又勦捕在三百里以外者並量給柴薪等因現在調征官兵雖非邊外而該逆夷滋擾內海食物無不昂貴且紮營處所均係沿海無處樵採該官兵均係自行買供柴薪所支鹽菜實不敷用惟有仰懇

天恩俯准援照出邊之例每兵月加銀四錢以資食用其官員及

兵丁餘丁鹽菜及官員口糧仍照例運供再官兵應給駝馬每兵二名例給駝馬一匹如馬不得力之處按每兵百名給夫八十名除應扣本身餘丁三十名應給夫五十名又查嘉慶五年勅辦四川案内奏定章程每兵百名酌湊給長夫四十名每夫日支工食銀八分其滿營官員及跟役並綠營官員跟役駝折夫價均折半給夫每夫日支銀八分其滿營派征甲兵應支馬乾折半支給其駝折夫價全數支給等因今應請照每兵百名給長夫四十名每夫日支工食銀八分其調征滿漢官員兵丁均照此例辦理至派撥守城之督標撫標綠營官員及駐防滿營官員仍

按防勦例酌量支給

楊芳又奏再等正在繕摺覆奏復於本月初七日承准
軍機大臣字寄道光二十一年二月二十三日奉

上諭本日據琦善等奏橫檔礮臺據報失守並另片奏靖遠等礮
臺據稟失守關天培不知下落等語深堪痛恨已有旨添派齊
慎為叅贊大臣赴粵會勦並調廣西省兵二千名迅赴廣東其
前調赴浙之湖廣兵二千八百名亦令改道入粵並諭知奕山
等兼程前進矣惟所奏失守情形皆由該弁兵探信稟報並關
天培有無下落殊深懸念計楊芳此時當已早抵廣東著即會
同阿精阿怡良等確切查明迅速具奏至所奏內河由獅子洋

而入烏涌獵德及二沙尾大黃窖等處均係扼要又烏涌迤西由長洲岡至黃埔深井之間有海心岡一處又折而西有白泥沖要隘亦須防堵等語現在琦善業已拏問英隆又派令押解各處要隘備防需人著楊芳阿精阿怡良郭繼昌會議熟商分頭駐守各省調到官兵亦著酌量分撥盡力堵禦至省垣重地尤關緊要必須嚴兵駐守以備不虞該大臣等務當協力同心嚴密防範毋任再有疏虞致干咎戾欽此又同日奉到

硃批琦善原摺片奏共三件跪讀之下兢惕難名所有關天培胸受礮傷頭面臂腿均受刀傷歿於行陣及夷船駛進各情

經前署督臣琦善暨李怡良等先後會奏在案現在保守

省垣。李楊芳等欽遵。

諭旨協力同心嚴密防守不敢稍涉疏虞致陷重罪其陸路提督郭繼昌駐紮惠州嚴防東路要隘未能分身來省當即恭錄移咨一體欽遵。

諭內閣楊芳等奏請酌加調征兵丁鹽菜並給長夫工食銀兩等語著照所請現在調征官兵應支鹽菜銀兩准其援照出邊之例每兵月加銀四錢俾資食用其官員及兵丁餘丁鹽菜及官兵口糧仍照例運供至每兵百名例給長夫四十名日支工食銀八分此次調征滿漢官員兵丁均著照此例辦理其派撥守城之督標撫標綠營及駐防滿洲營官兵仍按防勦例酌量支

給該部知道

諭軍機大臣等。本日據楊芳馳奏。暎逆退出省河。遵旨力籌堵禦。一摺。據秦咪喇堅等國。向准貿易商船。駛進黃埔。乘時貿易等語。逆夷滋擾。與咪喇堅等國無涉。原可准予通商。惟該大臣前奏。有咪喇堅等國稟稱。暎國夷商情亦急迫。可否一體貿易。俾兵船有所顧忌等語。暎夷商船。雖未隨同助逆。總係逆暎之人。斷不准其通商。此次各國貿易。如有代逆銷售。朦混影射等弊。即著嚴行查辦。萬不可稍存遷就之見。致逆夷得遂通商之欲。計奕山隆文祁項當已先後進省。各處調兵。亦必陸續抵粵。該將軍等一面防守省城。一面相機勦辦。所奏逆夷退出省河。是

否仍在虎門以內彼既深入重地但能斷其後路不難聚而殲
旃著仍遵前旨雇募水勇準備船礮奮力合剿朕拭目以俟捷
音之至也又另片奏關天培身受多傷歿於行陣前已有旨賞
給銀兩准予世職查明子孫幾人服闋赴部引見並於遇害地
加建立專祠矣所有該提督靈櫬回籍時著飭知沿途地方各
官妥為護送所請酌加調征官兵鹽菜等銀已明降諭旨准行
矣將此諭知奕山隆文楊芳並阿精阿祁墳怡良知之

庚戌

諭軍機大臣等著祁墳怡良傳知林則徐賞給四品卿銜迅即馳
驛前赴浙江省聽候諭旨

欽差大臣江蘇巡撫裕謙奏竊等承准軍機大臣字寄道光二十一年二月二十七日奉

上諭據海齡春請將沿海通商各馬頭港口嚴密查察暫為一律封閉等語著該大臣等體察目前情形是否可行悉心妥議具奏海齡摺著鈔給閱看等因欽此等因伏查濱海之區地多斥鹵民無恆產而性習於海有力者貿易於南北兩洋貨物因之流通小民藉資生計無不者以船為家以漁為業出沒於驚濤駭浪之中冀有所獲以易升合即就江浙兩省而論此等仰食於海者已不下十數萬人其因貿易以沾潤澤者竟難數計閩廣兩省斥鹵更甚貿易更廣人數之多

可以類推。一經封港，有力者雖可支持，市廛業已蕭索，無力者頓失所天，必將流而為盜。且聞上年定海失陷以後，漁戶人等因礙其採捕之路，無不同仇共憤。現署定海縣事之石浦同知舒恭受在鄞縣任內，一呼而集者數百艘，欲圖恢復。因軍令不准，遂皆解散。然亦並無接濟之事。至九月以後，該逆始駕杉板小船在浙東沿海一帶採買牲畜，購覓淡水。小民雖貪其利，仍不敢與之交易。嗣見官尚送給牛羊食物，遂亦交接無忌。迨撫臣劉韻珂到任，嚴行申禁。始稍斂迹。是接濟逆夷者，係沿海愚民，且係導之使然。並非商漁船隻。蓋商船之身家殷實，一船可值數千金。多

者數萬金。地方官發給印照。其來有自。其去有所。沿海之
官兵差役。無不耳而目之。設有接濟。斷難掩瞞。藉端勒索。
勢所必至。所得不償所失。是以多知自好。漁船雖無身家。
而朝出晚歸。例有一定口岸。出入皆有稽查之人。船身窄
小。有無夾帶。更不難一望而知。況上年在乍浦洋面。幫同
官兵擊退夷船者。商船也。江浙兩省。雇備渡載。征兵者。商
船也。查探夷情。救護定海難民者。漁船也。豫備火攻。追逐
夷船者。漁船也。現在之往來定海。濟渡官兵糧餉者。亦皆
漁船。是商漁船隻。皆為我所必用。本和自和斷無用其船而不准謀
生之理。即有不法商漁。勾通接濟。必停泊於人迹不到之

偏僻海峽。斷不敢出入於眾目昭彰之通商正口。是封港之議。徒有礙於安分商漁。而於杜絕接濟之法。仍未得其要領。再查漁戶冒險採捕。終歲勤動。僅能糊口。竟有終其身未見洋銀一圓者。其接濟夷匪。亦不過貪獲厚利。而其所得。究屬有限。若能許以重賞。激勸而用之。斷不肯舍無窮之富貴。而冒死接濟。以求有限之錢財。至於到浙後。懸立賞格。勸諭諸色人等。同心殺賊。如有透漏接濟者。即以通賊論斬。併將上年擒解逆夷偽官晏士喇喇打釐之民人包祖才等。正身查出。從優獎賞。月餘以來。民情孚洽。踴躍奮興。竟有糾集多人。或以購買煙土為由。或以捕魚為

名潛伏於山陬海澨以待逆夷之來。設法擒繫以邀重賞者官兵亦因之而愧奮。咸思敵愾當此用人用船之際。所有該副都統奏請封港之處。應毋庸議。至漢奸一項。籍隸江浙二省者甚少。即閩粵漢奸本皆

朝廷赤子。或為利誘。或為勢逼。陷入夷黨。情亦可憫。果能殺賊歸來。固當與平民一律獎賞。即畏罪潛回。自行投首。祇須察其意出真誠。有人具保。亦應量從寬宥。解散賊黨。莫善於此。惟甘心從逆者。必得設法購拿。梟示海濱。並籍沒其財產。緣坐其家屬。以正人心而彰

國法。若漫言接捕。非特阻其自新之路。抑且堅其從逆之心。

不啻為淵駭魚更恐啟挾嫌訐告株累良民之漸似亦非
宜。竊愚昧之見接濟必應禁港則斷不可封漢奸必應拏
辦理尤須得法再去年六月夷船初至。竊在江蘇巡撫任
內曾有封港之議嗣經留心體察商情民情均多不便旋
於九月初間即奏明開港在案目前浙江之定海已復大
幫夷船亦已遠遶江蘇則自上年九月以後並無夷船蹤
跡今昔情形不同竊不敢稍事遷就致多窒礙

裕謙又奏竊於三月初六日由招寶山渡海適值風潮平
順不逾兩時即抵定海馬頭連日周歷查看該縣境在鎮
海乍浦之東石浦象山之北屹立洋面縱橫三百餘里東

西北皆層巒疊嶂山脚沿海均有淺灘小船處處可以登岸。惟進東之沈家門。進西之岑港。兩處水勢較深。可容一。二大船。然皆距城在五六十里之外。中隔崇山峻嶺。是我步卒最易見長之地。已於該處各置陸兵防守。可保無虞。該縣城池三面負山。半束鎖山於內。前有稻桶山。接連東嶽山。為之屏障。左右有晚峯青壘諸山。輔翼形勢最為扼要。雖南面一二里即臨大海。有吉祥竹山大渠三。四為外洋進港之門戶。港內洋面寬廣。水深千數丈。逆夷大船皆可寄碇。攻我城池。然該逆礮力雖能及城。而不能洞城上。年該逆乘其無備。前來豕突。設我鎮將弁兵固守城池。不

紛紛攜眷內渡。該逆何敢登陸攻城。遽遭失陷。蓋定海非不可守之城。乃無守城之人所致也。言念及此。不勝憤恨。爰現經督同臬司周開麒。總兵王錫朋。鄭國鴻。葛雲飛。及江浙文武各員。虛衷採訪。相度形勢。擬於東嶽山巔築礮城一座。周圍一百三十一丈。南面接築月城一座。計二十一丈。又自青壘山至竹山脚。橫築土城一道。共長一千四百餘丈。又曉峯嶺青壘山。無樣山。鎖山。各置瞭臺。兵房。擇要安設礮位。或背山立營。或倚城捍衛。聲勢均已聯絡。首尾皆能策應。設使逆夷在粵敗挫。再來嘗試。希圖一逞。則我礮皆能及彼。彼礮不能及我。寓守於戰。允為以逸待勞。

之計。所有礮城土城各工。先經分列督飭次第興辦。月餘以來。最要之道頭土城二百三十餘丈。做照河工搶險之法。逐日委員跑牌買土。雖值春雨兼旬。而大小委員。皆立於風雨之中。晝夜督築。尤幸役夫均係難民。既思得錢餬口。又圖自衛身家。老幼奔馳。爭先恐後。截至十五日。查驗土城已有八九分工程。其次要之道頭以西四百餘丈。又次之東嶽山以東八百丈。亦有六七分工程。現在船泊海洋。已為土城遮護。不能窺伺。內城再開兩旬。便可一律完工。至定海內城牆垣。敝裂無多。不過城堦損壞。趕修尚易。為加其礮城兵房。亦經豫飭購運。甄石解工。應用並鑿。

削東嶽山向外石腳使之陡立不能攀援即以石料就近
工用此等審度形勢相機設守並以工代賑之情形也定
海孤懸海外雖守禦加嚴而內地策應之兵不可不預籌
進步逆夷專恃船戰未便與之洋面擊逐等已密飭鎮將
帶同弁兵時於島巖往來奔走務期熟悉形勢瞭如指掌
即雨夜亦能登陟並於岱山召募水勇三百名定海四五
百名石浦鎮海四五百名無論海島漁民及閩省船戶擇
其水性熟諳膂力技藝過人者派委員弁配領新造十六
槳快船及買雇漁船百餘隻分起帶領或假扮網魚買販
出洋巡哨或密帶火器槍械相機焚勦儻該逆兵船再來

滋擾。即由穿山歧頭山等處載渡。各路陸兵從中接應。務使山巖險夷。皆無阻滯。洋面偵探聲息相通。水勇攻勦。其船官兵兜擒於陸。用我所長。攻彼所短。此紮密籌內外策。應及招募水勇之情形也。逆夷占據定海。至八月之城廂內外。鋪戶居民。全行逃散。除偏僻鄉寨數處。該逆未敢深入。此外近城市肆。無不遭其荼毒。官兵初至。人跡稀疏。經紮於附近沿海各縣。徧示招徠。並委江南候補知府黃冕。浙江甯波府知府鄧廷彩等。馳往會督。署定海縣事。石浦同知舒恭受。趕辦撫卹。安集逃亡。俾得及早復業。又另派江南試用通判孫逢堯。帶同委員。將甯波等處收養難

民資送回籍。經臬司周開麟督同該員等於頽垣瓦礫內查明房屋間數。照例給發修費。趕營棲止。一面查造保甲。挨貼門牌。分別大小戶口。查給口糧。仍將應撫姓名及給發房屋修費。按照戶數口數間數米數銀數。先行榜示。使眾咸知。俾實惠均沾。無所蒙蔽。其應發銀米責成各委員親身散放。不經胥役之手。此等督查房間戶口撫卹難民之情形也。伏思定海一城。既須防守。目前尤宜遠籌善後。舊設總兵一員。統轄水師二千六百名。專管巡防洋面。無城守之責。故前總兵張朝營不肯退保城池。以致縣城失陷。茲當兵燹之後。必須添設陸路官兵。以資城守。併為水

師接應。惟

國家經費有常。須於別營裁撤抽撥。方無糜餉之慮。容與提

臣余步雲將內地陸路各營通盤籌計。咨會浙閩督撫。臣

彙入善後章程。奏明辦理。將大局籌定。擬於拜摺後。仍

回鎮海軍營。居中調度。候定海撫卹放竣。土城礮城等工

全完。再當親歷查驗。指授機宜。以期有備無患。一勞永逸。

裕謙又奏。竊等承准軍機大臣字寄。道光二十一年二月

二十六日奉

上諭。夷船遊奕無定。情殊叵測。難保不藉端赴江蘇一帶滋擾。江

蘇各營兵力強弱。裕謙所深知。儻該夷船分頭肆擾。該省兵丁

能否堵禦著審度情形悉心籌畫如不能深資得加即著派委
總兵一員帶領弁兵馳赴江蘇應援儻有可乘之機併力攻勦
亦可以示懲創該大臣務當於江浙兩省現在夷船遊奕情形
不分畛域通盤籌畫首尾相應切勿顧此失彼等因欽此伏查
議戰先須議守江蘇地方以吳淞海口及崇明寶山三處
最為險要崇明地方有蘇松鎮總兵田松林統領該標官
兵三千餘名駐紮巡防兵力已不為單又經撥添礮位足
以壯其聲勢惟向來該總兵每以巡洋為名常川駐紮吳
淞海口以致營伍不甚整頓兵民亦不輯睦文職知縣職
分較卑每受弁兵之侮而無可如何李深知其弊是以於

上年接署督篆後即先之以訓誡繼之以申飭並責成田
松林欽遵

諭旨鎮守崇明凡事與文職印委各員秉公商推和衷共濟前署
崇明縣知縣沈炳垣現任崇明縣知縣熊傳譽本得民心
又有委赴崇明協守之丹徒縣知縣王德茂勤明勇幹曉
暢兵機與沈炳垣熊傳譽協力同心不避勞怨多方激勸
兵民始皆用命自上年八月三十日王德茂之姪監生王
敷政親率鄉勇協同弁兵居民在長安河勦殺夷匪擊退
夷船之後兵民人等咸知眾志可以成城無不踴躍奮興
願圖殺賊立功保家報

國田松林熊傳譽王德茂三員果能始終如一弗蹈故轍則
崇明一縣似已有備無患其吳淞海口居民無多專藉兵
力礮加調防該處之提標兵丁雖不為強而安設礮位既
多又有沿海土塘可以藏兵避礮我兵立身不敗之地膽
氣自壯提臣陳化成老成勇健諳悉夷情自上年六月迄
今住宿單布帳房與兵無異晝夜弗離即使該夷豕突而
來內港河道曲折暗沙縷結止能魚貫而入不能併幫疾
駛且其來也必用杉板小船探水引路即如上年七八月
間該逆屢次用杉板船突入口門測量水勢皆為提臣陳
化成開礮擊退以後即不敢窺伺是其明證此後潮汐日

旺南風將至。正是未雨綢繆之際。李業已咨會兩江督臣
伊里布。署江蘇撫臣程喬采。崔慕川。沙廳之小漁船。俗名
海燕子者。暗藏水勇。攜帶糧礮。許以重賞。潛伏口門之外。
專擊其杉板小船。並誘其大船。行入暗沙。使之擱淺。相機
攻勦。或乘黑夜。縱火焚燒。不獨吳淞海口。可保無虞。即寶
山亦可恃之無恐。蓋寶山之離吳淞海口。僅止數里。彼此
可以互相策應。其城雖屬濱海。而外有淺灘。上有陡立之
海塘。非用杉板船。剝載不能登岸。海中既有漁船。追逐岸
上。又用槍礮轟擊。該逆似無能為。至上海。雖有吳淞海口
為之保障。而為通商馬頭。即為吳淞海口之後路。調防該

處之漕河兩標兵丁皆係健卒前此等人在兩江總督任內
奏奉

諭旨飭令馳驛赴任之新任徐州鎮總兵王志元聞其勇敢有為
如已到江即可派令管帶以守禦為應援可期得加僮尚
未到浙江現有衢州鎮總兵李廷揚久歷戎行堪以派往
等亦已咨詢伊里布尚未准其咨覆又江甯省局所造檣
礮五百桿已據具報完工內除等帶赴浙江軍營一百桿
外尚有四百桿可以先行分撥沿海地方練習施放以資
防勦其由河南省代造三五百桿計亦可以陸續解到火
藥一項昨接程爾來來函據稱現已趕緊加工春辦不致

缺誤是江蘇情形似已戰守兩有把握惟制敵之道首重體察民情因其勢而利導之勿事張皇以搖惑民心勿因軍需而擾累民加勿誇敵強以阻喪民氣勿任弁兵之攘冒民功則民志堅定樂為我用何敵不克蓋兵有數而民無數江浙沿海居民雖奸良不一畢竟良民較多奸民百之一二因材器使信賞必罰良者固可用奸者亦可化而為良若反其道而行之專恃兵加則寇未至而民間先已譁然勇者觀望智者隱藏懦者遷徙黠者煽惑悍者搶奪富者遠害全身貧者幸災樂禍自相驚擾草木皆兵雖有百萬雄師千員健將安內之不暇何暇攘外乎受

恩深重。從不敢稍有吟域之見。即如沿海情形。廣東軍務。苟有一得。無不奏請。

訓示江蘇為李本管地方。又蒙

聖恩倚畀。

諭令通盤籌畫。李更何敢稍存諉卸自外。

生成。惟鎮海軍營距寶山等處。中隔五府二十餘縣。程途遙遠。勢難兼顧。且夷船遊奕情形。朝東暮西。時時有變。又非陸路之可以按程計算者。比誠恐緩不濟急。李惟有勉竭愚誠。隨時偵探。彼此關照。凡有應商應辦之處。立即飛咨伊里布。和衷辦理。斷不敢稍分吟域。亦不敢稍避怨嫌。以期仰

報

高厚鴻慈於萬一。

裕謙又奏再奉承准軍機大臣字寄道光二十一年二月二十九日奉

上諭前據裕謙奏參升任甘肅藩司周開麒託故推諉當降旨令其開缺交部屢加議處仍留浙江委用該部議上時自必照議革職惟現在定海辦理各事宜是否必須該員經理並該員能否得力之處著裕謙確切查明據實具奏再降諭旨欽此伏查周開麒前因託故推諉經奉於二月十二日恭摺奏參十四日即據該員來營稟到深知愧懼二十日仍馳赴定海

又經李附片奏明在案。前李抵定海後，確查該員督辦撫卹難民，散放房屋修費，及趕築各項工程，均能真實認真，不辭勞怨，洵屬得加。且浙江司道中藩司常恆昌駐紮省城，枕嘉湖道宋國經赴乍浦防堵甯紹台道尚開模在甯波府彈壓，此外實無堪委大員如蒙

天恩，將周開麒留於軍營差委，該員自必倍加感奮，李可收指臂之助。

諭內閣：前據海齡奏請將沿海通商各馬頭暫時封閉，當降旨令伊里布裕謙議奏。旋據伊里布奏擬一律封閉，朕即覺所議窒礙難行，降旨駁斥。茲據裕謙奏封港之議，徒有礙於安分商漁。

而於杜絕接濟。仍未得要領等語。所見極是。沿海通商各馬頭。著照舊准商民往來貿易。毋庸封港。並嚴飭文武員弁。於商漁船隻出入。實力稽查。如有匪徒透漏消息。接濟該夷米糧硝磺等物。即著懲辦。以順輿情。而杜勾結。

又

諭前因升任甘肅藩司周開麒於浙江臬司任內。經裕謙調赴定海。辦理撫卹各事宜。託故推諉。當降旨交部嚴加議處。本應即照部議革職。姑念該員自到定海後。督辦撫卹難民。散放房屋修費。並趕築各項工程。均能費實。尚知愧奮。周開麒著加恩賞給按察使銜。留於浙江軍營。交裕謙差委。以觀後效。

諭軍機大臣等。裕謙奏審度江蘇堵禦情形。並辦理定海善後事。宜各一摺。尚屬周妥。據奏江蘇各海口形勢。兼撥派將備水陸交防。自可無虞。失事鎮海距甯山等處。程途雖遠。該大臣仍應隨時偵探。凡有緊要應辦之處。即飛咨伊里布先為籌畫。一面會商定見。措置得宜。方稱妥善。定海難民。經該大臣趕辦撫恤。安集逃亡。其興辦堵禦各工。將次告竣。以工代賑。最為良法。如果人心堅定。自能眾志成城。至召募水勇。分路防守。亦應時加練習。俾知衝城。即所以自衛。不可恃眾滋擾。務使兵民相安。守望相助。惟發給難民銀米。須責成委員親身散放。勿經胥役之手。以免侵冒。剋扣。所有添設陸路官兵以資接應之處。著即與

余步雲等會商妥協具奏。至江甯河南所造撞礮。除帶赴浙江軍營一百桿外。如尚不敷用。仍著隨時調撥。又覆奏海齡請將沿海通商馬頭封閉一摺。所見甚是。已明降諭旨。毋庸封港矣。裕謙又奏。再浙江省自檢獲逆夷一名。殺傷三名。後夷船旋即竄去。半月以來。附近一帶洋面。並無夷船蹤跡。惟據台州府具報所屬之甯海縣。有夷船一隻。在金漆門等處外洋。遊奕無定等語。等已密派員弁。帶領兵勇。馳往該處相機辦理。

硃批知道了。

裕謙又奏。再查康熙年間。曾暫准紅毛夷船。在定海通商。

久經停止而該縣之南馬頭俗尚呼為紅毛道頭附近併有夷館基址等抵定海後留心採訪自道光十二年以來每至夏秋輒有夷船駛入浙江洋面因該道頭地方多有閩人寄寓暗銷鴉片煙土並接濟淡水牲畜是以距定海一二百里之青龍港東西碇等處洋面竟為該逆熟遊寄碇之所等現在修築土城已將紅毛道頭及夷館基址全行拆毀並將該處民房遷徙城內酌留兩門出入晝夜宵開一如內城之制使土城以外一無所有以絕逆夷覬覦之念而斷內地接濟之源定海本非商賈輳集之所居民多以耕漁為業別無他項貨運於守禦既便於民間亦無

不便

殊批所辦甚好

壬子參贊大臣楊著廣東巡撫怡良奏竊李等前據咪喇
噶領事哆喇哪代港腳求請通商未敢遽行允准業於二
月三十日恭摺由驛具奏仰祈

訓示在案伏查咪喇噶貨船本准通商因上年暎夷滋事被其阻
遏半載有餘本月初九日奏報該國貨船照常進埔貿易
咪夷久滯之貨一旦通商無不歡欣鼓舞感戴

皇仁暎國夷商亦皆從旁歆羨是其志在通商已可概見故自具
奏後暎夷尚屬安靜不致再行肆擾昨據咪喇噶領事

等國代求以港脚雖係暎夷所屬但距暎國二萬餘里並未隨同滋事此時各國貨船俱已進口而並未滋事之港脚似不便再令向隅以示區別即義律向咪喇堅領事稱述亦言暎國稱兵之事與港脚各商無涉所有暎國祖家貨船情願聽候

諭旨不敢遽行進口惟港脚無辜受累致阻其貨渠實對他不佳囑其代請隨同開槍貿易等語查港脚為暎咭喇所屬先經奏明一併封港在案今既查明港脚夷商並未附和滋事則當於順逆之中權其變通之道且據洋商查報港脚貨船內有洋米九船計米約三萬餘石粵東山海交錯產

殺無多向資西米洋米接濟茲港脚夷商既仍載米而來
參三五
是其並非包藏禍心亦尚可信且與民食實有裨益藉可
安撫民人似應准令港脚貨船一併開艙以廣
聖主柔遠之仁兼以去暎國附和之勢

楊著怡良又奏再查粵東濱臨大海各國通商已二百餘
年虎門為省城之鎖鑰各礮臺又為沿海之藩籬所以控
制外夷者實藉於此今虎門既已失守近省獵德大黃窖
等處亦俱被闖入省城別無屏障可以控禦城中如藩關
運道各庫存銀將及四百餘萬監獄倉廩在在喫重且聞
閩雲連人煙輻輳刻下外無保障內切隱憂殊有岌岌不

安之勢前於奏報虎門失守摺回粵欽奉

上諭省垣重地尤關緊要必須嚴兵駐守以備不虞等因仰見
聖衷垂念合城官民同深感泣現雖奉調貴州湖南江西四川等
省官兵陸續到粵者已有八千餘名然皆不嫻水戰夷船
在水面施放礮火我兵僅能在岸禦敵不及交鋒既無善
策以操必勝之機豈敢徑行以忘剝膚之害旬日以來
夷所以安靜者其意實戀通商茲據咪喇堅等國堅代港
脚懇求而嘆夷之祖家船仍不得進口似尚有畏罪服輸
之意且咪喇堅等國與港脚夷商平日貨物交通彼此互
相攬帶勢難逐船釐剔與其暗被朦混何如明示

恩施商情既以相安。兵船即不能妄肆。惟窺嘆夷現在情形。一因探聞靖逆將軍督催後路大兵源源而來。一因探聞李揚芳於二月十九日。奏請改水師為陸路。牢固藩籬。獨不准該逆通商。是以情急。先挾船礮之長。拚死闖入省河。果能攻破城垣。則全省為彼所有。不事干求。後見鎮定守禦無所施其伎倆。因而求他夷轉懇。不求別情。較之琦善前年也。琦善亦不事干求。求於不事干求。要求賞地情形。似有區別。以目前局勢而論。似宜先准貿易。暫作羈縻。以便從容布置。可期計出萬全矣。

殊批。若貿易了事。又何必將帥兵卒。如此徵調。又何必逮問琦善所見甚差。即有旨諭。

諭內閣前因暎逆大肆猖獗傷我提鎮大員臺經降旨命楊芳先行會同怡良等領兵攻勦以申天討而快人心今據楊芳等奏各省調兵到粵已有八千餘名之多尚不及時進勦遷延觀望甚至仍請准令暎夷所屬之港脚商船在粵貿易是有意阻撓怠慢軍心殊出情理之外楊芳怡良著先行交部嚴加議處諭軍機大臣等本日楊芳怡良奏准港脚貨船通商一摺又另片奏省垣情形等語覽奏憤懣之至已明降諭旨將楊芳怡良先行交部嚴議矣逆夷情狀詭譎反覆無常早經窺破非大加懲創何以揚國威而除後患現在各路征調兵丁一萬六千有餘陸續抵粵楊芳何以不痛加勦洗乃遷延觀望有意阻撓汲汲

以通商為詞是復蹈琦善故轍變其文而情則一。殊不可解。前經奏請各國通商朕因俯順輿情勉從所請今復以港脚船隻尚無助逆情事敢於嘗試若如此了結又何必命將出師紛紛徵調官兵且該逆傷我提鎮大員及陣亡兵弁為數甚夥此等忠魂何以克慰楊芳等祇知運就完事不顧國家大體殊失朕望即所稱貨船附載洋米等語全不可信況鴉片來源即在於此又何以示禁令而除流弊此時更無他議惟有進勸一法奕山隆衣經朕面諭一切必能仰體朕意現已到粵兵多糧足自當與楊芳齊慎協力同心為國宣勞以膺懋賞斷不准提及通商二字坐失機宜此次批摺著發給閱看奕山等接奉此旨著

迅速督飭兵弁分路兜勦務使該逆片帆不返俾知做畏儻夷
船聞風遠遁空勞兵加惟該將軍等是問懔之

癸丑浙江巡撫劉韻珂奏查去年逆船在定洋遊奕至八
月之久且曾攬及乍浦難保無漢奸到處窺伺將險要虛
竇潛向該逆告述一經在粵受挫必至返擾浙洋定海現
駐重兵該逆或不肯冒死再犯惟海甯乍浦兩口均為省
城門戶籌防固宜周密而省城逼近兩口設備更須整嚴
是防海更須防陸防逆尤應防奸臣業經札飭杭州府知
府王壽昌督同仁錢二縣多為添雇鄉勇勤加練習分撥
關廂協助兵加並多製火礮備守城垣至陸路攻禦惟烏

槍擡礮長矛最為利器。杭營烏槍向有額設而擡礮向無儲備。浙匠亦不諳製造。即所有矛桿俱用本地竹木質性鬆脆。遠不如白蠟桿之堅實。足資撥紉。臣查河南省打造擡礮最為得法。白蠟桿亦產自該省。合無仰懇

天恩。敕下河南撫臣飭屬代為打造擡礮五百桿。購備直長白蠟桿三千根。迅速委解來浙。以便分撥應用。其用過銀兩俟該省咨到。即於截留軍需項下撥解還款。

諭內閣。劉韻珂奏請飭河南省代備擡礮白蠟桿。分撥應用等語。浙江省現在防禦逆夷。軍械必應寬為儲備。著河南巡撫飭屬代為打造擡礮五百桿。購備直長白蠟桿三千根。迅速解赴浙

江省備用惟器械固須精良而運用尤宜嫻熟著顏伯壽劉韻珂飭令各營將弁等隨時練習以收實效餘著照所議辦理該部知道

甲寅

諭軍機大臣等現在山海關各海口辦理礮臺事竣所有秦王島石河口各口駐紮滿洲營兵丁著即調回本營勤加操練其所調冷口喜峯口二處防守兵丁並著撤回歸伍至秦王島澄海樓二處安設礮位仍著富勒敦泰酌派弁兵在彼常川瞭望以免疏虞

靖逆將軍奕山參贊大臣隆文奏竊擊等於三月初五初

九日兩次承准軍機大臣字寄奉

上諭飭令星夜趨行並督率後到官兵整旅而進如可抄賊後路相機攻勦等因欽此仰蒙

聖主指示方明跪聆之下欽佩無極當即一面趨行一面飛咨浙
省止續調官兵二千八百名廣西新調官兵二千名今
其迅速南下又札飭南韶連道楊九哱除已過韶境赴省
者無庸停止外其餘無論何省續到者全行截留令其整
頓軍火聽候隨同前往各在案等於三月十二日馳過
廣東南雄州界接准南韶連道稟稱雲貴湖南四川官兵
由韶赴省者已有八千餘名此外各省後起官兵尚未抵

粵無兵可留。現撥韶州鎮標兵三百名護送。李等又催到湖北參將達三所帶弁兵三百名。隨同前往。至續調湖南湖北廣西兵丁。尚未入境。不能久待。惟廣東礮位大半散失。除守城安放外。餘贖不數。攻守益據。江西撫臣谷稱。札委員外郎福奎等稟稱。江西舊存鐵礮十餘位。因存貯年久。不堪施放。此外湖南廣西續調者。尚未據咨覆。所謂礮礮亦未到。粵李等正在焦急。又訪聞虎門失守後。兵船直抵黃埔。海珠寺礮臺亦為所得。貨船停泊廣州城外。逆夷屢次施放大礮。火箭打入城內。更兼奸民乘機焚掠。內外商民紛紛逃避。適味喇噎懇求通商。省中大臣等曾事羈

糜許為奏請刻下逆夷兵船不肯退出外洋仍在黃埔接
應本報云聲言候李到省即求定局等語李等聞之不勝憤悶伏
思逆夷內犯以來占據礮臺連傷提鎮兇燄所至豈真莫
之敢當總緣前此議撫自撤藩籬使得乘虛深入進逼門
庭在該大臣等因時制宜可以從權而李等奉

命征勦豈敢依違觀望坐失機宜上負

委任惟兵力既難猝集礮火又未運到設李等到省拒絕通商夷
人必盡力攻城儻有意外之虞救援不及是欲保廣州反
速之失陷目下寇志不宜再長

本報云國威不宜再損必須計出萬全方合

聖訓此時督臣祁項現過梅嶺等等在韶州暫行停泊飛咨該督
臣迅速趕赴會商聚集各路官兵在距省旱路可通扼要
地方分營防守催齊火藥暗造攻守器具分頭埋伏激勵
兵勇出其不意將內泊者先行痛勦使逆夷喪膽並堵截
各河港以示以久守聞夷船糧儲窘迫利在速戰不過急
於要脅售貨以濟其用若堅壁清野俾漢奸無利可貪黨
羽既翦然後派撥精銳抄其後路木障填河而下水陸連
環分道兜擒使逆夷片帆不返以彰

天討而快人心

硃批所見頗當朕惟伫待捷音焦切之至

諭軍機大臣等奕山隆文奏接奉諭旨並籌辦情形一摺覽奏均
悉據奏暫候祁項到韶州面商一切並須製造器具兼催趕各
路官兵等語該將軍等相機而行極為妥協現在祁項想已趕
到各省官兵計應陸續抵粵礮火及各項器具亦不日可成該
將軍等諒早馳赴省城會合一處抄襲該夷前後路徑併力攻
勦不使逃遁昨楊芳怡良奏請准與港脚船隻通商朕因其怠
慢軍心已降旨交部嚴議奕山隆文經朕面授機宜且屢次寄
諭飭令一鼓作氣殄滅醜類該將軍參贊等務當激發忠良協
力同心以揚國威而伸天討切勿為浮言所動是為至要